

*legis omi-
ad con-
risum de
abdicta
pellent-
milia
idonea
tendis
fissent,
am ante
iendum
inqua-
bus sa-
ppae et
fficio in
ia, non
coningio
inuerat.
rtii dote
e plebe,
ret, bi-
angulos
dela-
incre-
Domi-
io sub
zionem
tores.
incipis
nortem
in mit-
cultiit,
tes suo*

*ulcisci. qua gloria aequabat se Tiberius priscis Imperatoribus, qui venenum in Pyrrhum regem vetue-
rant; prodiderantque. Ceterum Arminius, absced-
entibus Romanis et pulso Maroboduo, regnum ad-
fectans, libertatem popularium adversam habuit, pe-
titusque armis, cum varia fortuna certaret, dolo pro-
pinorum cecidit: liberator haud dubie Germaniae,
et qui non primordia Populi Rom. sicut alii Reges
Ducesque, sed florentissimum imperium lassicerit:
proeliis ambiguus, bello non victus. septem et trin-
ta annos vitae, duodecim potentiae explevit: cani-
turque adhuc barbaras apud gentes; Graecorum an-
nalibus ignotus, qui sua tantum mirantur: Romanis
haud perinde celebris, dum vetera extollimus, re-
centium incuriosi.*

C. CORNELII TACITI

AB

EXCESSV DIVI AVGVSTI

A N N A L I V M

LIBER TERTIVS.

BREVIARIVM LIBRI.

CAP. 1. *Agrippina, cum urna ferali, magno plan-
ctu passim excipitur.* 2. *Funerum solemnia.* Primo-
res urbis obvii. 3. *Tiberius, Augusta et Antonia pu-
blico abstinent.* 4. *Moeror publicus.* 5. *Tiberius,*
parcus visus in honorando funere, 6. *excusat se et po-
pulum erigit.* 7. *Iustitium omissum.* *Drusus ad Illy-*
TACITVS I.

G

ricos exercitus abit; 8. Piso ad Drusum, 9. inde Romam alaci animo. 10. Mox accusatur. Princeps caussam ad Senatum remittit. 11. Patroni reo quaesiti. 12. Tiberii oratio ad Patres. 13. Accusatorum criminacionem 14. reus male diluit. In eum iudices haud proni; populus offensissimus. 15. Plancina caussam suam dissociat. Pisonis mors, 16. dubium an iussu, et ad Tiberium codicilli. 17. Piso filius absolvitur. Plancina Augustae precibus condonatur. Sententias in Pisonem 18. Princeps mitigat. Adulatio imprudens. 19. Drusus ovat. Vipsania moritur. 20. Tacfarinas bellum in Africa renovat. 21. id Apronii severitate opprimitur. 22. Lepida, suppositi partus, adulterii, beneficii accusata, 23. Tiberio perplexe agente, damnatur. 24. Silanus exsilio veniam impetrat. 25. Lex Papia Poppaea. Delatores. 26. Excursus de legibus, quae initio paucae et simplices, paullatim primo, 27. deinde inmensum auctae. 28. earum correctio tentata. 29. Nero Germanici, ad honores promotus; Iuliam dicit, Drusi filiam. 30. Volusii et Sallustii mors et elogium. Aulae potentia infida.

31. Tiberius et Drusus Coss. Irreverentia iuuentutis notata. Viarum cura. 32. Tacfarinas turbat iterum. Lepidus Asiae Proconsul. 33. Vxores a provinciis arcet Caecina; 34. ei repugnat Val. Messalinus, adstipulante Druso. 35. Blaesus Proconsul Africæ. 36. Abusus imaginum Principalium 37. repressus a Druso. 38. Accusati repetundarum, maiestatis. Thraciae motum 39. Velleius comprimit. 40. Gallia ducibus Floro et Sacroviro rebellat. 41. Andecavos coerct Aviola; Turonios opprimit. 42. Florus sua manu cadit. finis Treverici tumultus. 43. Aeduos turbat Sacrovir; 44. Romanus percellit, non Tiberium. 45. Silius 46. Gallos fundit, crupellarios caedit. Sacrovir sibi manum infert. 47. Tiberius

simulat iter in Gallias. 48. Quirini mors honestata.
49. Lutorius accusatus 50. defenditur a Lepido, 51.
necatur in carcere. SC. de differenda poena.

52. Aediles de luxu coercendo agunt. Senatus
rem remittit ad Principem. 53. 54. hic medicinam
a tempore sperandam pronuntiat. 55. Paullatim
sponte mutati mores. 56. Tribunitia potestas petita
Druso et 57. impetrata cum adulazione Patrum. 58.
Flamen dialis ambit provinciam. 59. alii obsistunt.
Drusus superbia notatur. 60—63. *Imago libertatis.*
Asyla Graecarum civitatum Senatus examinat et mo-
dum praescribit. 64. *Augustae morbus.* Tiberii in
matrem non sincerus amor. 65. Tempora foeda adul-
latione infecta. 66. C. Silanus, repetundarum et
maiestatis postulatus 67. a multis urgetur et a Prin-
cipe ipso et 68. damnatur. Dolabellae adulacionem
69. reprimit Tiberius et sententias mitigat. 70. Cor-
dus, Ennius, Capito rei. 71. Equestris Fortuna. Ius
Flaminium. 72. Basilica Paulli. Pompeii theatrum.
73. Tacfarinatis petitio impudens. 74. Blaesus eum
adgreditur. fratrem eius capit; nec bellum conficit.
75. Mors Salonini, Capitonis, 76. Iuniae, cuius so-
lemne funus. Haec triennio gesta

M. VALERIO ET M. AVRELIO COSS.

TIBERIO IMP. IV. ET DRVSONERONE II. COSS.

C. SVLPICIO ET D. HATERIO COSS.

Nihil intermissa navigatione hiberni maris, Agrippina Coreyram insulam advehitur, litora Calabriae contra sitam. Illic paucos dies componendo animo insumit, violenta iuctu, et nescia tolerandi. Interim, adventu eius auditio, intimus quisque amicorum, et plerique militares, ut quique sub Germanico stipendia fecerant, multique etiam ignoti vicinis e municipi-

piis, pars officium in Principem rati, plures illos sequiti, ruere ad oppidum Brundisium; quod naviganti celerrimum fidissimumque ad pulsu erat. Atque, ubi primum ex alto visa classis, complentur non modo portus et proxima maris, sed moenia ac tecta, quaque longissime prospectari poterat moerentium turba et rogitantium inter se, *silentione, an voce aliqua egredientem exciperent?* neque satis constabat, quid pro tempore foret: cum classis paullatim successit, non alacri, ut adsolet, remigio, sed cunctis ad tristitiam compositis. Postquam duobus cum liberis, feralem urnam tenens, egressa navi, defixit oculos, idem omnium gemitus: neque discerneres, proximos, alienos, virorum feminarumve planetus: nisi quod comitatum Agrippinæ, longo moerore fessum, ovvii et recentes in dolore anteibant.

II. Miserat duas praetorias cohortes Caesar, addito, *ut magistratus Calabriae Apulique et Campani suprema erga memoriam filii sui munera fungerentur.* Igitur Tribunorum, Centurionumque humeris cineres portabantur; praecedebant incompta signa, versi fasces: atque, ubi colonias transgrederentur, atrata plebes, trabeati Equites, pro opibus loci, vestem, odores, aliaque funerum solennia, cremabant. etiam quorum diversa oppida, tamen ovvii, et victimas atque aras Diis Manibus statuentes, lacrimis et conlationibus dolorem testabantur. Drusus Tarracinam progressus est cum Claudio fratre liberisque Germanici, qui in urbe fuerant. Consules, M. Valerius et C. Aurelius (iam enim magistratum occoepserant) et Senatus ac magna pars populi viam complevere, disiecti, et, ut cuique libitum, flentes. aberat quippe adulatio, gnaris omnibus, laetam Tiberio Germanici mortem male dissimulari.

III. Tiberius atque Augusta publico abstinuere, inferius maiestate sua rati, si palam lamentarentur

an, ne, omnium oculis vultum eorum scrutantibus, falsi intelligerentur. Matrem Antoniam non apud auctores rerum, non diurna actorum scriptura, reperio, ullo insigni officio functam; cum, super Agrippinam et Drusum et Claudium, ceteri quoque consanguinei nominatim perscripti sint: seu valetudine praepediebat, seu victus luctu animus magnitudinem mali perferre visu non toleraverit. facilius crediderim, Tiberio et Augusta, qui domo non excedebant, cohibitam, ut par moeror, et matris exemplo avia quoque et patruus attineri viderentur.

IV. Dies, quo reliquiae tumulo Augusti infabantur, modo per silentium vastus, modo ploratibus inquieres: plena urbis itinera, conlueentes per campum Martis faces. illic miles cum armis, sine insignibus magistratus, populus per tribus, *concidisse Rempubl.*, *nihil spei reliquum*, clamitabant; promptius apertiusque, quam ut meminisse imperitantium crederes. Nihil tamen Tiberium magis penetravit, quam studia hominum accensa in Agrippinam; cum *deucus patriae*, *solum Augusti sanguinem*, *unicum antiquitatis specimen* adpellarent, versique ad coelum ac Deos *integrę illi subolem*, ac *superstitem iniquorum*, precentur.

V. Fuere, qui publici funeris pompam requirerent, compararentque, quae in Drusum, patrem Germanici, honora et magnifica Augustus fecisset. ipsum quippe asperrimo hiemis Ticinum usque progressum, neque abscedentem a corpore simul urbem intravisse: circumfusas lecto Claudiorum Lixiorumque imagines: defletum in foro, laudatum pro rostris: cuncta a maioribus reperta, aut quae posteri invenerint, cumulata. At Germanico ne solitos quidem, et cuicunque nobili debitos honores, contigisse. Sane corpus, ob longinquitatem iterum, externis terris quoquo modo crematum: sed tanto plura decora mox tribui par fuisset,

quanto prima fors negavisset. non fratres, nisi unius diei via, non patrum, saltem porta tenus, obvium. ubi illa veterum instituta? propositam toro effigiem, meditata ad memoriam virtutis carmina, et laudationes et lacrimas, vel doloris imitamenta?

V. Gnarum id Tiberio fuit; utque premeret vulgi sermones, monuit edicto: *Multos inlustrium Romanorum ob Rempubl. obiisse; neminem tam flagrantissimam desiderio celebratum. idque et sibi et cunctis egregium, si modus adiiceretur. non enim eadem decora Principibus viris et Imperatori Populo, quae modicis dominibus aut civitatibus. convenisse recenti dolori luctum, et ex moerore solatia: sed referendum iam animum ad firmitudinem, ut quondam D. Iulius, amissa unica filia, ut D. Augustus, ereptis nepotibus, abstruserint tristitiam. Nil opus vetustioribus exemplis: quotiens Populus Romanus clades exercitum, interitum Ducum, funditus amissas nobiles familias constanter tuliterit. Principes mortales, Remp. aeternam esse. proin repelerent solennia; et, quia ludorum Megalesium spectaculum suberat, etiam voluptates resumerent.*

VII. Tum, exuto iustitio, redditum ad munia; et Drusus Illyricos ad exercitus profectus est, erectis omnium animis spe petenda e Pisone ultioris, et crebro questu, quod, vagus interim per amoena Asiae atque Achaiae, adroganti et subdola mora scelerum probationes subverteret. Nam vulgatum erat, missam, ut dixi, a Cn. Sentio famosam beneficiis Martinam, subita morte Brundisii extinctam, venenumque nodo crinium eius occultatum, nec ulla in corpore signa sumpti exitii reperta.

VIII. At Piso, praemisso in urbem filio, datisque mandatis, per quae Principem molliret, ad Drusum pergit: quem haud fratri interitu trucem, quam remoto aemulo aequiorem sibi sperabat. Tiberius, quo integrum iudicium ostentaret, exceptum comiter

iuvenem, sueta erga filios familiarum nobiles liberitate auget. Drusus Pisoni, *si vera forent, quae iacentur, praecipuum in dolore suum locum*, respondit; *sed malle falsa et inania, nec cuiquam mortem Germanici exitiosam.* Haec palam, et vitato omni secreto: neque dubitabant praescripta ei a Tiberio, cum in-callidus alioqui et facilis iuventa, senilibus tum artibus uteretur.

IX. Piso Dalmatico mari tramsso, relictisque apud Anconam navibus, per Picenum, ac mox Flaminiam viam, adsequitur legionem, quae e Pannonia in urbem, dein praesidio Africæ, ducebatur. eaque res agitata rumoribus, *ut in agmine atque itinere crebro se militibus ostentavisset.* Ab Narnia, vitandae suspicionis, an, quia pavidis consilia in incerto sunt, Nare ac mox Tiberi devectus, auxit vulgi iras, quia navem tumulo Caesarum adpulerat; dieque et ripa frequenti, magno clientium agmine ipse, seminarum comitatu Plancina, et vultu alacres incessere. Fuit inter irritamenta invidiae domus foro imminens, festa ornata, conviviumque et epulæ, et celebritate loci nihil occultum.

X. Postera die Fulcinius Trio Pisonem apud Consules postulavit. contra Vitellius ac Veranius, ceterique, Germanicum comitati, tendebant, *nullas esse partes Trioni; neque se accusatores, sed rerum indicies et testes, mandata Germanici perlatus.* Ille, dismissa eius caussae delatione, *ut priorem vitam accusaret, obtinuit, petitumque est a Principe, cognitionem exciperet:* quod ne reus quidem abnuebat, studia populi et Patrum metuens; contra, *Tiberium sphenendis rumoribus validum, et conscientiae matris in nexum esse: veraque aut in deterius credita, iudice ab uno facilius discerni: odium et invidiam apud multos valere.* Haud fallebat Tiberium moles cognitionis, quaque ipse fama distraheretur. Igitur, paucis fa-

miliarium adhibitis, minas accusantium et hinc preces audit, integrāmque caussam ad Senatum remittit.

XI. Atque interim Drusus, rediens Illyrico, quam quā Patres censuissent, ob receptum Maroboduum, et res priore aestate gestas, ut ovans iniret, prolato honore, urbem intravit. Post quae reo, *L. Arruntium, T. Vinicium, Asinium Gallum, Aeserninum Mārcellum, Sex. Pompeium* patronos petenti, iisque diversa excusantibus, *M. Lepidus et L. Piso et Livineius Regulus* adfuerē, adrecta omni civitate, *quanta fides amicis Germanici, quae fiducia reo: satin' coheret ac premeret sensus suos Tiberius.* iis haud alias intentior populus, plus sibi in Principem occultae vocis aut suspicacis silentii permisit.

XII. Die Senatus Caesar orationem habuit meditato temperamento: *Patris sui Legatum atque amicum Pisonem fuisse, adiutoremque Germanico datum a se, auctore Senatu, rebus apud Orientem administrandis.* illuc contumaciā et certaminibus asperasset iūvenem, exituque eius laetus esset, an scelere extinxisset, integris animis diiudicandum. Nam, si Legatus officii terminos, obsequium erga Imperatorem, exuit, eiusdemque morte et luctu meo laetus est; odo, seponamque a domo mea, et privatas inimicitias non vi Principis ulciscar: sin facinus, in cuiuscunque mortalium nece vindicandum, detegitur; vos vero et liberos Germanici, et nos parentes, iustis solatiis adfice. simulque illud reputate, turbide et seditione tractaverit exercitus Piso; quae sita sint per ambitionem studia militum; armis repetita provincia; an falsa haec in maius vulgaverint accusatores: quorū ego niniis studiis iure succenseo. Nam quo pertinuit, nudare corpus, et contrectandum vulgi oculis permittere, differri que etiam per externos, tanquam veneno interceptus esset; si incerta adhuc ista, et scrutanda sunt?

Defleo euidem filium meum, semperque deflebo: sed neque reum prohibeo, quo minus cuncta proferat, quibus innocentia eius sublevari, aut, si qua fuit iniq[ui]tas Germanici, coargui possit: vosque oro, ne, quia dolori meo caussa connexa est, obiecta crimina pro adprobatis accipiatis. Si quos propinquus sanguis, aut fides sua patronos dedit, quantum quisque eloquentia et cura valet, iuvate periclitantem: ad eundem laborem, eandem constantiam accusatores hortor. Id solum Germanico super leges praestiterimus, quod in curia potius, quam in foro, apud Senatum, quam apud iudices, de morte eius anquiritur. cetera pari modestia tractentur. nemo Drusi lacrimas, nemo moestitiam meam spectet, nec, si qua in nos adversa finguntur.

XIII. Exin biduum criminibus obiiciendis statuitur, utque, sex dierum spatio intericto, reus per tri-dum defendetur. Tum Fulcinius vetera et inania orditur: ambitiose avareque habitam Hispaniam: quod neque convictum noxae reo, si recentia purgaret; neque defensum absolutioni erat, si teneretur maioribus flagitiis. Post quem Servaeus et Veranius et Vitellius, consimili studio, sed multa eloquentia Vitellius, obiecere: odio Germanici, et rerum non varum studio, Pisonem vulgus militum, per licentiam et sociorum iniurias, eo usque corrupisse, ut parens legionum a deterrimis appellaretur: contra, in optimum quemque, maxime in comites et amicos Germanici, saevisse: postremo, ipsum devotionibus et veneno peremisse: sacra hinc et immolations nefandas ipsius atque Plancinae: petitam armis Remp., utque reus agi posset, acie victim.

XIV. Defensio in ceteris trepidavit. nam neque ambitionem militarem, neque provinciam pessimo cuique obnoxiam, ne contumelias quidem adversum Imperatorem inficiari poterat: solum veneni crimen

visus est diluisse. quod ne accusatores quidem satis firmabant, *in convirio Germanici, cum super eum Piso discumberet, infectos manibus eius cibos,* arguentes. quippe absurdum videbatur, inter aliena servitia, et tot adstantium visu, ipso Germanico coram, id au-sum. offerebatque familiam reus, et ministros in tormenta flagitabat. Sed iudices per diversa in placabiles erant: Caesar, ob bellum provinciae in latum; Senatus, nunquam satis credito, sine fraude Germanicum interiisse. * *scripsissent* expostulantes: quod haud minus Tiberius quam Piso abnuere. Simul populi ante curiam voces audiebantur: *non temperaturos manibus, si Patrum sententias evasisset.* effigiesque Pisonis traxerant in Gemonias, ac devellebant, ni iussu Principis protectae repositaeque forent. Igitur inditus lecticae, et a Tribuno praetoriae cohortis deductus est: vario rumore, custos salutis, an mortis exactor sequeretur.

XV. Eadem Plancinae invidia, maior gratia: eoque ambiguum habebatur, quantum Caesari in eam liceret. atque ipsa, donec mediae Pisoni spes, *sociam se cuiuscumque fortunae, et, si ita ferret, comitem exitii* promittebat. Ut secretis Augustae precibus veniam obtinuit, paullatim segregari a marito, dividere defensionem coepit, quod reus postquam sibi exitibile intelligit, an adhuc experiretur dubitans, hortantibus filiis, durat mentem, Senatumque rursum ingreditur: redintegratamque accusationem, infensas Patrum voces, adversa et saeva cuncta perpessus, nullo magis exterritus est, quam quod Tiberium sine miseratione, sine ira, obstinatum clausumque vidit, ne quo affectu perrumperetur. relatus domum, tamquam defensionem in posterum meditaretur, pauca conscribit obsignatque, et liberto tradit. Tum solita curando corpori exequitur. dein, multam post noctem, egressa cubiculo uxore, *operiri* fores iussit:

et copta luce, perfosso iugulo, iacente humili gladio,
repertus est.

XVI. Audire me memini ex senioribus, visum sae-
pius inter manus Pisonis libellum, quem ipse non
vulgaverit; sed amicos eius dictitavisse, litteras Ti-
berii et mandata in Germanicum continere: ac desti-
natum promere apud Patres, Principemque arguere,
ni elusus a Sciano per vana promissa foret: nec illum
sponte extinctum, verum immisso percussore. quorum
neutrum adseveraverim: neque tamen oculere de-
bui narratum ab iis, qui nostram ad iuuentam dura-
verunt. Caesar, flexo in moestitiam ore, suam invi-
diam tali morte quaesitam apud Senatum, * crebris-
que interrogationibus exquirit, qualem Piso diem su-
premium noctemque exegisset. Atque illo pleraque
sapienter, quaedam inconsultius respondente, recitat
codicillos, a Pisone in hunc ferme modum composi-
tos: *Conspiracye inimicorum, et invidia falsi crimi-
nis oppressus, quatenus veritati et innocentiae meae
nusquam locus est, Deos immortales testor, vixisse me,*
*Caesar, cum fide adversum te, neque alia in matrem
tuam pietate: vosque oro, liberis meis consulatis: ex
quibus Cn. Piso qualicunque fortunae meae non est
adiunctus, cum omne hoc tempus in urbe egerit: M.
Piso repetere Syriam dehortatus est. atque utinam
ego potius filio iuveni, quam ille patri seni cessisset!* eo impensis precor, ne meae pravitatis poenas inno-
xius sit. Per quinque et quadraginta annorum ob-
sequium, per collegium Consulatus quondam D. Au-
gusto, parenti tuo, probatus, et tibi amicus, nec quid-
quam post haec rogaturus, salutem infelicitis filii rogo.

XVII. De Plancina nihil addidit. Post quae Ti-
berius adolescentem crimine civilis belli purgavit:
patris quippe iussa, nec potuisse filium detrectare: si-
mul nobilitatem domus, etiam ipsius, quoquo modo
meriti, gravem casum miseratus. Pro Plancina cum

pudore et flagitio disseruit, *matris preces* obtendens: in quam optimi eiusque secreti questus magis ardescabant: *Id ergo fas aviae, interfetricem nepotis adspicere, adloqui, eripere Senatui? quod pro omnibus civibus leges obtineant, uni Germanico non contigisse!* *Vitellii et Veranii voce defletum Caesarem: ab Imperatore et Augusta defensam Plancinam!* perinde venena, et aries tam feliciter expertas, verteret in Agrippinam, in liberos eius, egregiamque aviam, ac patruum sanguine miserrimae domus exsatiaret. Bidiuum super haec, imagine cognitionis, absumptum; urgente Tiberio liberos Pisonis, matrem uti tuerentur. Et, cum accusatores ac testes certatim perorarent, respondentे nullo, miseratio, quam invidia, augebatur. Primus sententiam rogatus Aurelius Cotta, Consul, (nam, referente Caesare, magistratus eo etiam munere fungebantur) nomen *Pisonis radendum fastis, censuit; partem bonorum publicandam: pars, ut Cn. Pisoni, filio, concederetur, isque praenomen mutaret.* *M. Piso exuta dignitate, et accepto quinquagies sestertio, in decem annos relegaretur, concessa Plancinae incolumitate, ob preces Augustae.*

XVIII. Multa ex ea sententia mitigata sunt a Principe: ne nomen *Pisonis fastis eximeretur, quando M. Antonii, qui bellum patriae fecisset, Iuli Antonii, qui domum Augusti violasset, manerent.* et M. Pisonem ignominiae exemit, concessitque ei paterna bona; satis firmus, ut saepe memoravi, adversum pecuniā, et tum pudore absolutae Plancinae placabilior. Atque idem, cum Valerius Messallinus, signum aureum in aede Martis Ultoris, Caecina Severus, aram ultioni statuendam, censuissent, prohibuit: *ob externas ea victorias sacrari, dictitans; domestica mala tristitia operienda.* Addiderat Messallinus, Tiberio et Augustae et Antoniae et Agrippinae Drusoque ob vindictam Germanici grates agendas, omiseratque

Claudii mentionem. Et Messallinum quidem L. Asprenas, Senatu coram, percunctatus est, *an prudens prae-terisset?* ac tum demum nomen Claudii adscriptum est. Mihi, quanto plura recentium seu veterum revolvο, tanto magis ludibria rerum mortalium cunctis in negotiis obversantur. quippe fama, spe, veneratio, potius omnes destinabant imperio, quam, quem futurum Principem fortuna in occulto tenebat.

XIX. Paucis post diebus Caesar auctor Senatui fuit, *Vitellio atque Veranio et Servaeo sacerdotia tri-buendi.* Fulcinio suffragium ad honores pollicitus, monuit, *ne facundiam violentia praecipitaret.* Is finis fuit ulciscenda Germanici morte, non modo apud illos homines, qui tum agebant, etiam securis temporibus vario rumore iactata. adeo maxima quaeque ambigua sunt, dum alii quoquo modo audita pro compertis habent; alii vera in contrarium vertunt. et gliscit utrumque posteritate. At Drusus, urbe egressus repetendis auspiciis, mox ovans introiit. paucosque post dies Vipsania, mater eius, excessit, una omnium Agrippae liberorum miti obitu. nam certos, manilestum, ferro, vel creditum est, veneno aut fame extinctos.

XX. Eodem anno Tacfarinas, quem priore aestate pulsum a Camillo memoravi, bellum in Africa renovat, vagis primum populationibus, et ob pernicitatem inultis: dein vicos exscindere, trahere graves praedas: postremo, haud procul Pagida flumine, cohortem Romanam circumsedit. Praeerat castello Decrius, impiger manu, exercitus militia, et illam obsidionem flagitii ratus. Is cohortatus milites, *ut copiam pugnae in aperto facerent,* aciem pro castris instruit. Primoque impetu pulsa cohorte, promptus inter tela occursat fugientibus, increpat signiferos, *quod inconditis, aut desertoribus miles Romanus terga daret:* simul excepta vulnera, et, quamquam trans-

*digitoris
lib. obte des
vixim 900*

fosso oculo, adversum os in hostem intendit; neque proelium omisit, donec, desertus suis, caderet.

XXI. Quae postquam L. Apronio, nam Camillo successerat, comperta; magis dedecore suorum, quam gloria hostis anxius, raro ea tempestate et e vetere memoria facinore, decumum quemque ignominiosae cohortis sorte ductos fusti necat. Tantumque severitate profectum, ut vexillum veteranorum, non amplius quingenti numero, easdem Taefarinatis copias, praesidium, cui Thala nomen, adgressas, fuderint. quo proelio Rufus Helvius, gregarius miles, servati civis decus retulit; donatusque est ab Apronio torquibus et hasta. Caesar addidit civicam coronam, *quod non eam quoque Apronius, iure Proconsulis, tribuisse*, questus magis, quam offensus. Sed Taefarinias, perculis Numidis, et obsidia adspernantibus, spargit bellum; ubi instaretur, cedens, ac rursum in terga remeans. et, dum ea ratio barbaro fuit, inritum fessumque Romanum impune ludificabatur: postquam deflexit ad maritimis locos, inligatus preda, stativis castris adhaerebat: missu patris Apronius Caesianus, cum equite et cohortibus auxiliariis, quis velocissimos legionum addiderat, prosperam adversum Numidas pugnam facit, pellitque in deserta.

XXII. At Romae Lepida, cui, super Aemiliorum decus, L. Sulla ac Cn. Pompeius proavi erant, deferunt, *si nularisse partum ex P. Quirino, divite atque orbo.* adiiciebantur adulteria, venena; quae situmque per Chaldaeos in domum Caesaris: defendantem ream Manio Lepido, fratre. Quirinus, post dictum repudium adhuc infensus, quamvis infami ac nocenti miserationem addiderat. Haud facile quis dispexerit illa in cognitione mentem Principis: adeo vertit ac miscuit irae et clementiae signa: deprecatus primo Senatum, ne maiestatis crimina tractarentur: mox M. Servilium, e Consularibus, aliquosque testes inlexit

ad proferenda, quae velut reticere voluerat. idemque servos Lepidae, cum militari custodia haberentur, transtulit ad Consules; neque per tormenta interrogari passus est de his, quae ad domum suam pertinerent. Exemit etiam Drusum, Consulem designatum, dicendae primo loco sententiae: quod alii civile rebantur, *ne ceteris adsentiendi necessitas fieret*: quidam ad saevitiam trahebant. *neque enim cesurum, nisi damnandi officio.*

XXIII. Lepida ludorum diebus, qui cognitionem intervenerant, theatrum cum claris feminis ingressa, lamentatione flebili *maiores suos* ciens, *ipsumque Pompeium*, cuius ea monumenta et adstantes imagines visebantur, tantum misericordiae permovit, ut, effusi in lacrymas, *saeva et detestanda Quirino* clamarent, *cruis senectae atque orbitati, et obscurissimae domui, destinata quondam uxor L. Caesari, ac D. Augusto nurus, dederetur*. dein tormentis servorum patetfacta sunt flagitia, itumque in sententiam Rubellii Blandi, a quo aqua atque igni arcebatur. huic Drusu adsensit, quamquam alii mitius censuissent. mox Sciauro, qui filiam ex ea genuerat, datum, ne bona publicarentur. Tum demum aperuit Tiberius: *compertum sibi etiam ex P. Quirini servis, veneno eum a Lepida petitum.*

XXIV. Inlustrium domuum adversa (etenim haud multum distanti tempore Calpurnii Pisonem, Aemilii Lepidam amiserant) solatio adfecit D. Silanus, Iuniae familiae redditus. casum eius paucis repetam. Ut valida D. Augusto in Rempublicam fortuna, ita domi inprospera fuit, ob impudicitiam filiae ac neptis, quas urbe depulit, adulterosque earum morte aut fuga punivit. nam culpam, inter viros ac feminas vulgaris, gravi nomine *laesarum religionum ac violatae maiestatis* adpellando, clementiam maiorum, suasque ipse leges egrediebatur. Sed aliorum exitus,

simul cetera illius aetatis, memorabo, si, effectis in quae tetendi, plures ad curas vitam produxero. D. Silanus, in nepti Augusti adulter, quamquam non ultra foret saevitum, quam ut amicitia Caesaris prohiberetur, exsilium sibi demonstrari intellexit: nec, nisi Tiberio imperante, deprecari Senatum ac Principem ausus est, M. Silani fratriis potentia, qui per insignem nobilitatem et eloquentiam praecellebat. Sed Tiberius grates agenti Silano, Patribus coram, respondit, *se quoque laetari, quod frater eius e peregrinatione longinqua revertisset. idque iure licitum, quia non Senatusconsulto, non lege pulsus foret. sibi tamen adversus eum integras parentis sui offendiones: neque reditu Silani dissoluta, quae Augustus voluisse.* Fuit posthac in urbe, neque honores adeptus est.

XXV. Relatum deinde de moderanda Papia Poppea, quam senior Augustus, post Iulias rogationes, incitandis caelibum poenis et augendo aerario sanxerat: nec ideo coniugia et educationes liberum frequentabantur, praevalida orbitate. Ceterum multitudo periclitantium gliscebat, cum omnis domus delatorum interpretationibus subverteretur: utque antehac flagitiis, ita tunc legibus laborabatur. Ea res admonet, ut de principiis iuris, et quibus modis ad hanc multitudinem infinitam ac varietatem legum perventum sit, altius disseram.

XXVI. Vetustissimi mortalium, nulla adhuc mala libidine, sine probro, scelere, eoque sine poena aut coercionibus agebant: neque praemiis opus erat, cum honesta suopte ingenio peterentur; et, ubi nihil contra morem cuperent, nihil per metum vetabantur. At, postquam exui aequalitas, et pro modestia ac pudore ambitio et vis incedebat; provenere dominaciones: multosque apud populos aeternum mansere. Quidam statim, aut postquam Regum pertaesum, leges maluerunt. Hae primo, rudibus hominum ani-

mis, simplices erant: maximeque fama celebravit Cretensium, quas Minos; Spartanorum, quas Lycurgus; ac mox Atheniensibus quaesitiores iam et plures Solon perscripsit. Nobis Romulus, ut libitum, imperitaverat: dein Numa religionibus et divino iure populum devinxit: repartaque quaedam a Tullo et Anco: sed praecipiuus Servius Tullius sanctor legum fuit, quis etiam Reges obtemperarent.

XXVII. Pulso Tarquinio, adversum Patrum factiones multa Populus paravit tuendae libertatis, et firmandae concordiae: creatique decemviri, et accitae, quae usquam egregia, compositae duodecim tabulae, finis aequi iuris. nam secutae leges, etsi aliquando in maleficos ex delicto, saepius tamen dissensione ordinum et apiscendi inlicitos honores, aut pellendi claros viros, aliaque ob prava, per vim latae sunt. Hinc Gracchi et Saturnini, turbatores plebis; nec minor largitor, nomine Senatus, Drusus; corrupti spe, aut inlusi per intercessionem socii. Ac ne bello quidem Italico, mox civili, omissum, quin multa et diversa sciscerentur: donec L. Sulla Dictator, abolitis vel conversis prioribus, cum plura addidisset, otium ei rei haud in longum paravit; statim turbidis Lepidi rogationibus, neque multo post Tribunis redditia licentia, quoquo vellent, populum agitandi. Iamque non modo in commune, sed in singulos homines latae quaestiones: et corruptissima Republica plurimae leges.

XXVIII. Tum Cn. Pompeius tertium Consul, corrigendis moribus delectus, et gravior remediis, quam delicta erant, suarumque legum auctor idem ac subversor, quae armis tuebatur, armis amisit. Exin continua per viginti annos discordia: non mos, non ius. deterrima quaeque impune, ac multa honesta exitio fuere. Sexto demum Consulatu Caesar Augustus, potentiae securus, quae Triumviratu iusserat, abole-

TACITVS I.

H

vit: deditque iura, quis pace et Principe uteremur. acriora ex eo vincla, inditi custodes, et lege Papia Poppaea praemiis inducti, ut, si a privilegiis parentum cessaretur, velut parens omnium Populus vacantia teneret. sed altius penetrabant; urbemque, et Italiam, et quod usquam civium, corripiarunt: multorumque excisi status: et terror omnibus intentabatur; ni Tiberius statuendo remedio, quinque Consularium, quinque e Praetoriis, totidem e cetero Senatu sorte duxisset, apud quos exsoluti plerique legis nexus modicum in praesens levamentum fuere.

XXIX. Per idem tempus Neronem, e liberis Germanici, iam ingressum iuuentam, commendavit Patribus, utque munere capessendi Vigintiviratus solveretur, et quinquennio maturius, quam per leges, Quae sturam peteret, non sine inrisu audientium postulavit. praetendebat, sibi atque fratri decreta eadem, petente Augusto. sed neque tum fuisse dubitaverim, qui eiusmodi preces occulti inluderent. ac tamen initia fastigii Caesariibus erant: magisque in oculis vetus mos, et privignis cum vitrico levior necessitudo, quam avo adversum nepotem. Additur Pontificatus, et, quo primum die forum ingressus est, congiarium plebi, admodum laetae, quod Germanici stirpem iam puberem adspiciebat. Auctum dehinc gaudium, nuptiis Neronis et Iuliae, Drusi filiae. Utque haec secundo rumore, ita adversis animis acceptum, quod filio Claudiis socer Seianus destinaretur. polluisse nobilitatem familiae videbatur, suspectumque iam nimiae spei Seianum ultra extulisse.

XXX. Fine anni concessere vita insignes viri, L. Volusius, et Sallustius Crispus. Volusio vetus familia, neque tamen Praeturam egressa: ipse Consulatum intulit, Censoria etiam potestate legendis Equitum decuriis functus, opumque, quis domus illa immensum viguit, primus adcumulator. Crispum, Eque-

stri ortum loco, C. Sallustius, rerum Romanarum flor-
entissimus auctor, sororis nepotem in nomen adsci-
vit. atque ille, quamquam prompto ad capessendos
honores aditu, Maecenatem aemulatus, sine dignitate
Senatoria, multos triumphalium consulariumque po-
tentia anteit: diversus a veterum instituto, per cul-
tum et munditias; copiaque et adfluentia luxu prop-
rior: suberat tamen vigor animi, ingentibus negotiis
par, eo aerior, quo somnum et inertiam magis ostend-
tabat. Igitur, incolumi Maecenate, proximus; mox
praecipuus, cui secreta Imperatorum inniterentur, et
interficiendi Postumi Agrippae conscius, aetate pro-
vecta, speciem magis in amicitia Principis, quam vim
tenuit, idque et Maecenati acciderat; fato potentiae,
raro sempiternae, an satias capit, aut illos, cum
omnia tribuerunt, aut hos, cum iam nihil reliquum
est, quod cupiant.

XXXI. Sequitur Tiberii quartus, Drusi secundus
Consulatus, patris atque filii collegio insignis. nam
biennio ante Germanici cum Tiberio idem honor, ne-
que patruo laetus, neque natura tam connexus fue-
rat. Eius anni principio Tiberius, quasi firmiandae
valetudini, in Campaniam concessit, longam et con-
tinuam absentiam paullatim meditans: sive, ut, amo-
to patre, Drusus munia Consulatus solus impleret.
Ac forte parva res, magnum ad certamen progressa,
praebuit iuveni materiem apiscendi favoris. Domiti-
tius Corbulo, Praetura functus, de L. Sulla, nobili
iuvene, questus est apud Senatum, *quod sibi inter-
spectacula gladiatorum loco non decessisset*. pro Cor-
bulone aetas, patrius mos, studia seniorum erant:
contra MamerCUS Scaurus et L. Arruntius aliique
Sullae propinqui nitebantur, certabant orationibus,
et memorabantur *exempla maiorum, qui iuventutis
in reverentiam gravibus decretis notavissent*. donec
Drusus apta temperandis animis disseruit; et satis-

factum Corbuloni per Mamercum, qui patruus simul ac vitricus Sullae, et oratorum ea aetate uberrimus erat. Idem Corbulo, plurima per Italiam itinera, fraude mancipum et incuria magistratum, interrupta et impervia, clamitando, execusionem eius negotii libens suscepit: quod haud perinde publice usui habitum, quam exitiosum multis, quorum in pecuniam atque famam damnationibus et hasta saeviebat.

XXXII. Neque multo post, missis ad Senatum litteris, Tiberius, motam rursum Africam incursu Tacfarinatis, docuit; iudicioque Patrum deligendum pro Consule gnarum militiae, corpore validum et bello suffecturum. quod initium Sex. Pompeius agitandi adversus M. Lepidum odii nactus, ut socordem, inopem, et maioribus suis dedecorum, eoque etiam Asiae sorte depellendum, incusavit, adverso Senatu, qui Lepidum mitem magis, quam ignavum, paternas ei angustias, et nobilitatem sine probro actam, honori quam ignominiae habendam ducebat. Igitur missus in Asiam. Et de Africa decretum, ut Caesar legeret, cui mandanda foret.

XXXIII. Inter quae Severus Caecina censuit, ne quem magistratum, cui provincia obvenisset, uxor comitaretur; multum ante repetito, concordem sibi conjugem, et sex partus enixam: seque, quae in publicum statueret, domi servarisse, cohibita intra Italiam, quamquam ipse pluris per provincias quadraginta stipendia explevisset. Haud enim frustra placitum olim, ne feminae in socios aut gentes externas traherentur: inesse mulierum comitatu, quae pacem luxu, bellum formidine morentur, et Romanum agmen ad similitudinem barbari incessus convertant. Non imbecillum tantum et imparem laboribus sexum, sed, si licentia adsit, saevum, ambitiosum, potestatis avidum: incedere inter milites, habere ad manum Centuriones: praesedisse nuper feminam exercitio cohortium, de-

cursu legionum. Cogitarent ipsi, quotiens repetundarum aliqui arguerentur, plura uxoribus obiectari: his statim adhaerescere deterrium quemque provincialium: ab his negotia suscipi, transigi: duorum egressus colî, duo esse praetoria: pervicacibus magis et impotentibus mulierum iussis; quae Oppiis quondam aliisque legibus constrictae, nunc vinculis exsolutis domos, fora, iam et exercitus regerent.

XXXIV. Paucorum haec adsensu audita, plures obturbabant, neque relatum de negotio, neque Caecinam dignum tantae rei censorem. mox Valerius Messallinus, cui parens Messalla, ineratque imago paternae facundiae, respondit: *Multa duritie veterum in melius et laetus mutata: neque enim, ut olim, obsideri urbem bellis, aut provincias hostilis esse. et pauca feminarum necessitatibus concedi, quae ne coniugum quidem Penates, adeo socios non onerent; cetera promiscua cum marito, nec ullum in eo pacis impedimentum. Bella plane accinctis obeunda: sed revertentibus post laborem, quod honestius, quam uxorium levamentum? At quasdam in ambitionem aut avaritiam prolapsas. Quid? ipsorum magistratum nonne pleroisque variis libidinibus obnoxios? non tamen ideo neminem in provinciam mitti. corruptos suepe pravitatis uxorum maritos: num ergo omnes caelibes integros? placuisse quondam Oppias leges, sic temporibus Reipubl. postulantibus: remissum aliquid postea et mitigatum, quia expedierit. Frustra nostram ignaviam alia ad vocabula transferri: nam viri in eo culpam, si femina modum excedat. porro ob unius aut alterius imbecillum animum male eripi maritis consortia rerum secundarum adversarumque. Simul sexum natura invalidum deserit, et exponi suo luxu, cupidinibus alienis. vix praesenti custodia manere inlaesa coniugia: quid fore, si per plures annos, in modum discidii, obliterentur? Sic obviam irent iis, quae alibi peccarentur, ut*

flagitiorum urbis meminissent. Addidit pauca Dru-
sus de matrimonio suo. nam Principibus adeunda
saepius longinqua imperii. Quotiens D. Augustum
in Occidentem atque Orientem meavisse, comite Li-
via? se quoque in Illyricum profectum; et, si ita con-
ducatur, alias ad gentes iturum, haud semper aequo ani-
mo, si ab uxore carissima, et tot communium liberorum
parente, divelleretur.

XXXV. Sic Caecinae sententia elusa. Et proximi
 Senatus die, Tiberius, per litteras castigatis oblique
 Patribus, quod cuncta curarum ad Principem reuic-
 rent, M. Lepidum et Iunium Blaesum nominavit, ex
 quis Proconsul Africæ legeretur. Tum audita am-
 borum verba, intentius excusante se Lepido, cum
valetudinem corporis, aetatem liberum, nubilem filiam
obtenderet: intellegereturque etiam, quod silebat,
*avunculum esse Seiani Blaesum, atque eo praevali-
 dum. Respondit Blaesus, specie recusantis, sed ne-
 que eadem adseveratione, et consensu adulantium
 haud iutus est.*

XXXVI. Exin promptum, quod multorum intimis
 questibus tegebatur. Incedebat enim deterrimo cui-
 que licentia, impune probra et invidiam in bonos ex-
 citandi, adrepta imagine Caesaris; libertique etiam
 ac servi, patrono vel domino cum voces, cum manus
 intentarent, ultro metuebantur. Igitur C. Cestius,
 Senator, disseruit: *Principes quidem instar Deorum*
esse: sed neque a Diis, nisi iustas, supplicum preces
audiri, neque quemquam in capitolium aliave urbis
templa perfugere, ut eo subsidio ad flagitia utatur.
Abolitas leges et funditus versas, ubi in foro, in limine
curiae, ab Annia Rusilla, quam fraudis sub iudice
damnavisset, probra sibi et minae intendantur, neque
ipse audeat ius experiri, ob effigiem Imperatoris oppo-
sitam. Haud dissimilia alii, et quidam atrociora cir-
cumstrepebant; precabanturque Drusum, daret ultio-

nis exemplum, donec accitam convictamque attineri publica custodia iussit.

XXXVII. Et Considius Aequus, et Coelius Cursor, Equites Rom. quod fictis maiestatis criminibus Magium Caecilianum, Praetorem, petivissent, auctore Principe, ac decreto Senatus puniti. Vtrumque in laudem Drusi trahebatur: *ab eo in urbe, inter coetus et sermones hominum, obversante, secreta patris mitigari.* neque luxus in iuvene adeo displicebat. *huc potius intenderet, diem editionibus, noctem conviviis traheret, quam solus, et nullis voluptatibus avocatus, maestam vigilantiam et malas curas exercebat.*

XXXVIII. Non enim Tiberius, non accusatores fatiscebant. Et Ancharius Priscus Caesium Cordum, Proconsulem Cretae, postulaverat repetundis; addito maiestatis crimine, quod tum omnium accusationum complementum erat. Caesar Antistium Veterem, e primoribus Macedoniae, absolutum adulterii, increpitatis iudicibus, ad dicendam maiestatis caussam retraxit, ut turbidum, et Rhescuporidis consiliis permixtum, qua tempestate, Cotye interfecto, bel' n adversus nos volverat. Igitur *aqua et igni iratum reo, adpositumque, ut teneretur insula*, *de Macedoniae neque Thracie opportuna.* Nam *Ti-* *acia, diviso imperio in Rhoemetalcen et liberos Cotyis,* quis ob infantiam tutor erat Trebellienus Rufus, insolentia nostri discors agebat; neque minus Rhoemetalcen, quam Trebellienum, incusans, popularium iniurias inultas sinere. Coeletae Odrusaeque et Dii, validae nationes, arma cepere, Ducibus diversis, et paribus inter se per ignobilitatem: quae caussa fuit, ne in bellum atrox coalescerent. pars turbant praesentia, alii montem Haemum transgreduntur, ut remotos populos concirent: plurimi ac maxime compositi, Regem urbemque Philippopolim, a Macedone Philippo sitam, circumsidunt.

XXXIX. Quae ubi cognita P. Velleio, (is proximum exercitum praesidebat) alarios equites ac leves cohortium mittit in eos, qui praedabundi, aut adsumentis auxiliis, vagabantur. Ipse robur peditum ad exsolvendum obsidium ducit. Simulque cuncta prospere acta: caesis populatoribus, et dissensione orta apud obsidentes, Regisque opportuna eruptione, et adventu legionis. neque aciem aut proelium dici decuerit, in quo semerpes ac palantes trucidati sunt, sine nostro sanguine.

XL. Eodem anno Galliarum civitates ob magnitudinem aeris alieni rebellionem cooptavere: cuius ex stimulator acerrimus, inter Treveros Iulius Florus, apud Aeduos Iulius Sacrovir. nobilitas ambobus et maiorum bona facta, eoque Romana civitas olim data, cum id rarum, nec nisi virtuti pretium esset. Ii secretis conloquiis, ferocissimo quoque adsumpto, aut quibus ob egestatem ac metum ex flagitiis maxima peccandi necessitudo, componunt, Florus Belgas, Sacrovir propiores Gallos concire. Igitur per conciliabula et coetus seditionis disserebant, de continuatione tributorum, gravitate fenoris, saevitia ac superbia praesidentium. et discordare militem, auditio Germanici exitio, egregium resumenda libertati tempus, si ipsi florentes, quam inops Italia, quam imbellis urbana plebes, nihil validum in exercitibus, nisi quod exterritum, cogitarent.

XLI. Haud ferme ulla civitas intacta seminibus eius motus fuit: sed erupere primi Andecavi ac Turonii. quorum Andecavos Acilius Aviola, Legatus, excita cohorte, quae Lugduni praesidium agitabat, coeruit. Turonii legionario milite, quem Visellius Varro, inferioris Germaniae Legatus, miserat, oppressi, eodem Aviola duce, et quibusdam Galliarum primoribus; qui tulere auxilium, quo dissimularent defectionem, magisque in tempore efferrent. spe-

ctatus et Sacrovir, intecto capite, pugnam pro Romanis ciens, ostentandae, ut ferebat, virtutis: sed captivi, ne incesseretur telis, adgnoscendum se praebuisse, arguebant. Consultus super eo Tiberius, adspersatus est indicium, aluitque dubitatione bellum.

XLII. Interim Florus insistere destinatis, pellere alam equitum, quae, conscripta Treveris, militia disciplinaque nostra habebatur, ut, caesis negotiatoribus Romanis, bellum inciperet: paucique equitum corrupti; plures in officio mansere. Aliud vulgus obaeratorum aut clientium arma cepit: petebantque saltus, quibus nomen *Ardenna*, cum legiones utroque ab exercitu, quas Visellius et C. Silius adversis itineribus obiecerant, arcuerunt. praemissusque cum delecta manu Julius Indus, e civitate eadem, discors Floro, et ob id navandae operae avidior, inconditam multitudinem adhuc disiecit. Florus incertis latebris victores frustratus, postremo, visis militibus, qui effugia insederant, sua manu cecidit. Isque Treverici tumultus finis.

XLIII. Apud Aeduos maior moles exorta, quanto civitas opulentior, et compriamendi procul praesidium. Augustodunum, caput gentis, armatis cohortibus Sacrovir occupaverat, et nobilissimam Galliarum subolem, liberalibus studiis ibi operatam, ut eo pignore parentes propinquosque eorum adiungeret. simul arma, occulte fabricata, iuventuti dispertit. Quadraginta millia fuere, quinta sui parte legionariis armis; ceteri cum venabulis et cultris, quaeque alia venantibus tela sunt. adduntur e servitiis gladiatuarie destinati, quibus more gentico, continuum ferri tegimen, *eruppellarios* vocant, inferendis ictibus inhabiles, accipiendis impenetrabiles. augebantur hae copiae, vicinarum civitatum, ut nondum aperta consensione, ita viritim promptis studiis, et certamine Ducum Romanorum, quos inter ambigebatur; utro-

que bellum sibi poscente. mox Varro, invalidus selecta, vigenti Silio concessit.

XLIV. At Romae, non Treveros modo et Aeduos, sed quatuor et sexaginta Galliarum civitates descivisse: adsumptos in societatem Germanos: dubias Hispanias: cuncta, ut mos famae, in maius credita. optimus quisque, Reipubl. cura, maerebat: multi odio praesentium, et cupidine mutationis, suis quoque periculis laetabantur: increpabantque Tiberium, quod, in tanto rerum motu, libellis accusatorum insumeret operam. An Iulum Sacrovirum maiestatis criminis reum in Senatu fore? exstisset tandem viros, qui cruentas epistolas armis cohicerent. miseram pacem vel bello bene mutari. Tanto impensius in securitatem compositus, neque loco, neque vultu mutato, sed, ut solitum, per illos dies egit: altitudine animi, an competerat, modica esse et vulgatis leviora.

XLV. Interim Silius, cum legionibus duabus incedens, praemissa auxiliari manu, vastat Sequorum pagos, qui finium extremi, et Aeduis contermini sociique, in armis erant. Mox Augustodunum petit proprio agmine, certantibus inter se signiferis, fremente etiam gregario milite: ne suetam requiem, ne spatia noctium opperiretur; viderent modo adversos et adspicerentur: id satis ad victoriam. Duodecimum apud lapidem Sacrovir copiaeque patentibus locis adparuere. in fronte statuerat ferratos, in cornibus cohortes, a tergo semermos. Ipse inter primores equo insigni adire, memorare veteres Gallorum glorias, quaeque Romanis adversa intulissent: quam decora victoribus libertas: quanto intolerantior servitus iterum victis.

XLVI. Non diu haec, nec apud laetos: etenim propinquabat legionum acies; inconditique ac militiae neseii oppidanii neque oculis neque auribus satis

competebant. contra Silius, etsi praesumpta spes hortandi caussas exemerat, clamitabat tamen: *Pudendum ipsis, quod Germaniarum victores aduersum Gallos tamquam in hostem, ducerentur. una nuper cohors rebellem Turonum, una ala Treverum, paucae huius ipsius exercitus turmae proflagavere Sequanos.* quanto pecunia dites et voluptatibus opulentos, tanto magis imbellis Aeduos evincite, et fugientibus consulite. Ingens ad ea clamor: et circumfudit eques, frontemque pedites invasere: nec cunctatum apud latera. paullum morae attulere ferrati, restantibus laminis aduersum pila et gladios: sed miles, cor- reptis securibus et dolabris, ut si murum perrumpret, caedere tegmina et corpora: quidam trudibus aut furcis inertem molem prosternere; iacentesque, nullo ad resurgendum nisu, quasi exanimis linquebantur. Sacrovir primo Augustodunum, dein metu deditio- nis in villam propinquam cum fidissimis pergit. Illic sua manu, reliqui mutuis ictibus occidere. incensa super villa, omnes cremavit.

XLVII. Tum demum Tiberius, ortum patratumque bellum, Senatui scripsit: neque dempsit aut ad- didit vero; sed *fide ac virtute Legatos, se consiliis superfluisse.* simul caussas, cur non ipse, non Drusus profecti ad id bellum forent, adiunxit, *magnitudinem imperii extollens;* neque decorum *Principibus, si una alterave civitas turbet, omissa urbe, unde in omnia regimen. nunc, quia non metu ducatur, iturum, ut praesentia spectaret componeretque.* Decrevere Pa- tres vota pro reditu eius supplicationesque, et alia decora. Solus Dolabella Cornelius, dum anteire ce- teros parat, absurdam in adulationem progressus, censuit, *ut ovans e Campania urbem introiret.* Igi- tur secutae Caesaris litterae, quibus se non tam va- cuum gloria praedicabat, *ut, post ferocissimas gentes perdomitas, tot receptos in iuventa aut spretos trium-*

phos, iam senior peregrinationis suburbanae inane praemium peteret.

XLVIII. Sub idem tempus, *ut mors Sulpicii Quirini publicis exsequiis frequentaretur*, petivit a Senatu. Nihil ad veterem et patriciam Sulpiciorum familiam Quirinus pertinuit, ortus apud municipium Lanuvium: sed impiger militiae, et acribus ministeriis, Consulatum sub D. Augusto, mox, expugnatis per Ciliciam Homonadensium castellis, insignia triumphi adeptus; datusque rector C. Caesari, Armeniam obtinenti, Tiberium quoque, Rhodi agentem, coluerat. quod tunc patefecit in Senatu: laudatis in se officiis, et incusato *M. Lollo*, quem, *auctorem C. Caesari pravitatis et discordiarum*, arguebat. sed ceteris haud laeta memoria Quirini erat, ob intenta, ut memoravi, Lepidae pericula, sordidamque et praepotentem senectam.

XLIX. Fine anni, C. Lutorium Priscum, Equitem Romanum, post celebre carmen, quo Germanici supraea defleverat, pecunia donatum a Caesare, conripuit delator, obiectans, *aegro Druso composuisse, quod, si extinctus foret, maiore praemio vulgaretur.* Id C. Lutorius in domo P. Petronii, socru eius Vitellia coram, multisque inlustribus feminis, per vaniloquentiam legerat. Ut delator exstitit; ceteris ad dicendum testimonium exterritis, sola Vitellia, *nihil se audivisse*, adseveravit. sed arguentibus ad perniciem plus fidei fuit. sententiaque Haterii Agrippae, Consulis designati, indictum reo ultimum supplicium.

L. Contra M. Lepidus in hunc modum exuersus est. *Si, P. C. unum id spectamus, quam nefaria voce C. Lutorius Priscus mentem suam et aures hominum poluerit, neque carcer, neque laqueus, ne serviles quidem cruciatus, in eum suffecerint. sin flagitia et facinora sine modo sunt, suppliciis ac remediis Principis moderationis, maiorumque et vestra exempla temperant: et*

vana a scelestis, dicta a maleficiis differunt. est locus sententiae, per quam neque huic delictum impune sit, et nos clementiae simul ac severitatis non poeniteat. Saepe audivi Principem nostrum conquerentem, si quis, sumpta morte, misericordiam eius praevenisset. vita Lutorii in integro est; qui neque servatus in periculum Reipubl. neque imperfectus in exemplum ibit. studia illi, ut plena recordiae, ita inania et fluxa sunt: nec quidquam grave ac serium ex eo metuas, qui suorum ipse flagitiorum proditor, non virorum animis, sed mulierularum adrepit. cedat tamen urbe et, bonis amissis, aqua et igni arceatur. Quod perinde censeo, ac si lege maiestatis teneretur.

LI. Solus Lepido Rubellius Blandus e Consularibus adsensit: ceteri sententiam Agrippae secuti: ductusque in carcere Priscus, ac statim exanimatus. Id Tiberius solitis sibi ambagibus apud Senatum incusavit, cum extolleret pietatem, quamvis modicas Principis iniurias acriter ulciscentium; deprecaretur tam praecipitis verborum poenas: laudaret Lepidum, neque Agrippam argueret. Igitur factum SC. ne decreta Patrum ante diem decimum ad aerarium deferrentur: idque vitae spatium damnatis prorogaretur. sed non Senatui libertas ad poenitendum erat; neque Tiberius interiectu temporis mitigabatur.

LII. C. Sulpicius, D. Haterius coss. sequuntur: inturbidis externis rebus annus, domi suspecta severitate adversum luxum, qui inmensum proruperat ad cuncta, quis pecunia prodigitur. Sed alia sumptuum, quamvis graviora, dissimulatis plerumque pretiis, occultabantur; ventris et ganeae paratus, adsiduis sermonibus vulgati, fecerant curam, ne Princeps antiquae parcimoniae durius adverteret. Nam, incipiente C. Bibulo, ceteri quoque Aediles disseruerant, sparsi sumptuariam legem, retitaque utensilium pretia augeri in dies: nec mediocribus remedii

sisti posse. et consulti Patres integrum id negotium ad Principem distulerant. Sed Tiberius, saepe apud se pensitato, an coerceri tam profusae cupidines possent? num coercitio plus damni in Remp. ferret? quam indecorum adtrectare, quod non obtineret: vel retentum ignominiam et infamiam virorum inlustrium posceret: postremo litteras ad Senatum compo-
suit, quarum sententia in hunc modum fuit.

LIII. Ceteris forsitan in rebus, P. C. magis expe-
diat, me coram interrogari et dicere, quid e Republ.
censem: in hac relatione, subtrahi oculos meos, me-
lius fuit, ne, denotantibus vobis ora ac metum singulo-
rum, qui pudendi luxus arguerentur, ipse etiam vide-
rem eos, ac velut deprenderem. Quod si mecum ante
viri strenui, Aediles, consilium habuissent, nescio, an
suasurus fuerim, omittere potius praevalida et adulta
vitia, quam hoc adsequi, ut palam fieret, quibus flagi-
tiis impares essemus. sed illi quidem officio functi
sunt, ut ceteros quoque magistratus sua munia im-
plere velim: mihi autem neque honestum silere neque
proloqui expeditum, quia non Aedilis, aut Praetoris, aut
Consulis partes sustineo: maius aliquid et excelsius a
Principe postulatur: et, cum recte factorum sibi quis-
que gratiam trahant, unius invidia ab omnibus pecca-
tur. Quid enim primum prohibere, et priscum ad mo-
rem recidere adgrediar? villarumne infinita spatio,
familiarum numerum et nationes? argenti et auri
pondus? aeris, tabularumque miracula? promiscuas
viris et feminis vestes? atque illa feminarum propria,
quis, lapidum caussa, pecuniae nostrae ad externas
aut hostilis gentes transferuntur?

LIV. Nec ignoro, in conviviis et circulis inceusari
ista, et modum posci: sed, si quis legem sanciat, poenas
indicat, iidem illi, civitatem verti, splendidissimo cui-
que exitium parari, neminem criminis expertem, cla-
mitabunt. Atqui, ne corporis quidem morbos veteres,

et diu auctos, nisi per dura et aspera coerces: corruptus simul et corruptor, aeger et flagrans animus, haud levioribus remedis restinguendus est, quam libidinibus ardescit. tot a maioribus repertae leges, tot, quas D. Augustus tulit: illae oblivione, hae, quod flagitosius est, contemptu abolitae, securiorem luxum fecere. nam, si velis, quod nondum retitum est, timeas, ne vetere: at, si prohibita impune transcederis, neque metus ultra, neque pudor est. Cur ergo olim parcimonia pollebat? quia sibi quisque moderabatur: quia unius urbis cives eramus: ne irritamenta quidem eadem, intra Italianam dominantibus. externis victoriis aliena, civilibus etiam nostra consumere didicimus. Quantulum istud est, de quo Aediles admonent! Quam, si cetera respicias, in levi habendum! At, hercule, nemo refert, quod Italia externae opis indiget, quod vita Populi Romani per incerta maris et tempestatum quotidie volvitur. ac, nisi provinciarum copiae et dominis et serviis et agris subvenerint, nostra nos scilicet nemora nostraque villae tuebuntur? Hanc, P. C. curam sustinet Princeps: haec omissa funditus Remp. trahet. reliquis intra animum medendum est: nos pudor; pauperes necessitas; divites satias in melius mutet. Aut, si quis ex magistratibus tantam industriam ac severitatem pollicetur, ut ire obviam queat; hunc et laudo, et exonerari laborum meorum partem fateor. sin accusare vitia volunt, dein, cum gloriam eius rei adepti sunt, simultates faciunt, ac mili relinquent, credite, P. C. me quoque non esse offendionum avidum: quas cum graves, et plerumque iniquas, pro Rep. suscipiam, inanes et irritas, neque mili aut vobis usui futuras, iure deprecor.

LV. Auditis Caesaris litteris, remissa Aedilibus talis cura; luxusque mensae, a fine Actiaci belli ad ea arma, quis Ser. Galba rerum adeptus est, per annos centum profusis sumptibus exerciti, paullatim exole-

vere. Caussas eius mutationis quaerere libet. Dites olim familiae nobilium, aut claritudine insignes, studio magnificentiae prolabebantur. nam etiam tum plebem, socios, regna colere, et coli licitum: ut quisque opibus, domo, paratu speciosus, per nomen et clientelas inlustrior habebatur. postquam caedibus saevitum, et magnitudo famae exitio erat, ceteri ad sapientiora convertere. simul novi homines e municipiis et coloniis atque etiam provinciis, in Senatum crebro adsumpti, domesticam parcimoniam intulerunt: et, quamquam fortuna, vel industria, plerique pecuniosam ad senectam pervenirent, mansit tamen prior animus. Sed praecipuus adstricti moris auctor Vespasianus fuit, antiquo ipse cultu victuque, obsequium inde in Principem et aemulandi amor validior, quam poena ex legibus et metus. Nisi forte rebus cunctis inest quidam velut orbis, ut, quemadmodum temporum vices, ita morum vertantur: nec omnia apud priores meliora, sed nostra quoque aetas multa laudis et artium, imitanda posteris, tulit. Verum haec nobis * maiores certamina ex honesto manent.

LVI. Tiberius, fama moderationis parta, quod ingruentis accusatores represerat, mittit litteras ad Senatum, quis *potestatem Tribuniciam* Druso petebat. Id summi fastigii vocabulum Augustus reperit, ne *Regis*, aut *Dictatoris* nomen adsumeret, ac tamen adpellatione aliqua cetera imperia praemineret. M. deinde Agrippam socium eius potestatis; quo defuncto, Tiberium Neronem delegit, ne successor in incerto foret, sic cohiberi pravas aliorum spes rebatur: simul modestiae Neronis, et suae magnitudini fidebat. Quo tunc exemplo Tiberius Drusum summae rei admovet: cum, incolumi Germanico, integrum inter duos iudicium tenuisset. Sed principio litterarum veneratus Deos, ut *consilia sua Reip. prospera-*

rent, modica de moribus adolescentis, neque in falso
sum aucta, retulit: *esse illi coniugem et tres liberos,*
eamque aetatem, qua ipse quondam a D. Augusto ad
capessendum hoc munus vocatus sit. Neque nunc pro-
pere, sed per octo annos capto experimento, compressis
seditionibus, compositis bellis, triumphalem et bis Con-
sulem, noti laboris participem sumi.

LVII. Praecepérant animis orationem Patres; quo quaesitior adulatio fuit. nec tamen repertum, nisi, ut effigies Principum, aras Deum, templa et ar-
cus aliaque solita censerent: nisi quod M. Silanus ex contumelia Consulatus honorem Principibus petivit:
dixitque pro sententia, ut publicis privatisve moni-
mentis, ad memoriam temporum, non Consulum nomi-
na praescriberentur, sed eorum, qui Tribuniciam po-
testatem gererent. At Q. Haterius cum, eius diei Se-
natus consulta aureis litteris figenda in curia, cen-
suisset, deridiculo fuit senex foedissimae adulatio[n]is,
tantum infamia usurps.

LVIII. Inter quae, provincia Africa Iunio Blaesō prorogata, Servius Maluginensis, Flamen Dialis, ut Asiam sorte haberet, postulavit, frustra vulgatum, dictans, non licere Dialibus egredi Italia. neque aliud ius suum, quam Martialis, Quirinaliumque Flaminium: porro, si hi duxissent provincias, cur Dia-
libus id vetitum? nulla de eo Populi scita, non in libris caerimoniarum reperiri. Saepe Pontifices Dialia sa-
cra fecisse, si Flamen valetudine aut munere publico impeditetur: duabus et septuaginta annis post Cornelii Merulae caudem neminem suffectum; neque tamen cessavisse religiones. Quod si per tot annos possit non creari, nullo sacrorum damno, quanto facilius absfutu-
rum ad unius anni Proconsulare imperium? Privatis olim similitatibus effectum, ut a Pontificibus Maximis ire in provincias prohiberentur: nunc, Deum munere, Summum Pontificum etiam summum hominum esse,

non aemulationi, non odio, aut privatis affectionibus obnoxium.

LIX. Adversus quae cum Augur Lentulus aliique varie dissererent, eo decursum est, *ut Pontificis Max. sententiam opperirentur.* Tiberius, dilata notione de iure Flaminis, decretas ob Tribuniciam Drusi protestatem caerimonias temperavit; nominatim arguens *insolentiam sententiae, aureasque litteras contra patrum morem.* Recitatae et Drusi epistolae, quamquam ad modestiam flexae, pro superbissimis accipiuntur: *Huc decidisse cuncta, ut ne iuvenis quidem, tanto honore accepto, adiret urbis Deos, ingrederetur Senatum, auspicia saltem gentile apud solum inciperet? Bellum scilicet, aut diverso terrarum distineri, litora et lacus Campaniae cum maxime peragrantem. sic imbui rectorem generis humani: id primum e paternis consiliis discere. sane gravaretur adspectum civium senex Imperator, fessamque aetatem, et actos labores praetenderet: Druso quod, nisi ex adrogantia, impedimentum?*

LX. Sed Tiberius, vim Principatus sibi firmans, imaginem antiquitatis Senati praebebait, postulata provinciarum ad disquisitionem Patrum mittendo. Crebrescebat enim Graecas per urbes licentia atque impunitas asyla statuendi: complebantur templa pessimis servitiorum: eodem subsidio obaerati adversum creditores, suspectique capitalium criminum receptabantur. Nec ullum satis validum imperium erat coercendis seditionibus populi, flagitia hominum, ut caerimonias Deum, protegentis. Igitur placitum, ut mitterent civitates iura atque legatos. Et quaedam, quod falso usurpaverant, sponte omisere: multae vetustis superstitionibus aut meritis in Populum Romanum fidebant. Magnaque eius diei species fuit, quo Senatus maiorum beneficia, sociorum pacta, Regum etiam, qui ante vim Romanam valuerant, decre-

ta, ipsorumque Numinum religiones introspexit, libero, ut quondam, quid firmaret, mutaretve.

LXI. Primi omnium Ephesii adiere, memorantes, non, ut vulgus crederet, *Dianam atque Apollinem Deo-
lo genitos: esse apud se Cenchrium amnem, lucum Or-
tygiam, ubi Latonam, partu gravidam, et oleae, quae
tum etiam maneat, adnisam, edidisse ea Numina: Deo-
rumque monitu sacramum nemus.* Atque ipsum illic
*Apollinem, post interfectos Cyclopas, Iovis iram vita-
visse. Mox Liberum patrem, bello victorem, supplici-
bus Amazonum, quae aram insederant, ignorisse. Au-
ctam hinc, concessu Herculis, cum Lydia potiretur,
caerimoniam templo: neque Persarum ditione diminu-
tum ius. Post Macedonas, dein nos servavisse.*

LXII. Proximi Magnetes L. Scipionis et L. Sul-
lae constitutis nitebantur: quorum ille Antiocho, hic
Mithridate pulsis, fidem atque virtutem Magnetum
decorare, uti *Diana Leucophrynae perfugium in-
violabile foret.* Aphrodisienses portac et Stratoni-
censes Dictatoris Caesaris, ob vetusta in parteis me-
rita, et recens D. Augusti decretum attulere. Lau-
dati, quod *Parthorum inruptionem, nihil mutata in
Populum Romanum constantia, pertulissent.* Sed Aphrodisiensium civitas Veneris, Stratonicensium
Iovis et Triviae religionem tuebantur. Altius Hie-
rocaesienses exposuere, *Persicam apud se Dianam,
delubrum, rege Cyro, dicatum.* et memorabantur *Per-
pernae, Isaurici, multaque alia Imperatorum nomina,*
qui non modo templo, sed duobus millibus passuum
eandem sanctitatem tribuerant. Exin Cyprii tribus
delubris, quorum vetustissimum Paphiae Veneri au-
tor Aeras, post filius eius, Amathus, Veneri Ama-
thusiae, et Iovi Salaminio Teucer, Telamonis patris
ira profugus, posuissent.

LXIII. Auditae aliarum quoque civitatum lega-
tiones. Quorum copia fessi Patres, et quia studiis

certabatur, Consulibus permisere, *ut perspecto iure, et si qua iniq[ue]ta involveretur, rem integrum rursum ad Senatum referrent.* Consules super eas civitates, quas memoravi, *apud Pergamum Aesculapii compertum asylum, retulerunt; ceteros obscuris ob vetustatem initius niti.* nam Smyrnaeos oraculum Apollinis, cuius imperio Stratonicidi Veneri templum dicaverint; Tenios eiusdem carmen referre, quo sacrare Neptuni effigiem aedemque iussi sint. propiora Sardianos: Alexandri victoris id donum: neque minus Milesios Dario Rege niti. sed cultus Numinum utrisque, Diana aut Apollinem venerandi. Petere et Cretenes simulacro D. Augusti. Factaque Senatus consulta, quis, multo cum honore, modus tamen praescribebatur, iussique ipsis in templis figere aera, sacrandam ad memoriam, neu specie religionis in ambitionem delaberentur.

LXIV. Sub idem tempus Iuliae Augustae valetudo atrox necessitudinem Principi fecit festinati in urbem reditus: sincera adhuc inter matrem filiumque concordia, sive occultis odiis. Neque enim multo ante, cum, haud procul theatro Marcelli, effigiem D. Augusto Iulia dicaret, Tiberii nomen suo postscriperat; idque ille credebat, ut inferius maiestate Principis, gravi et dissimulata offensione abdisset. Sed tum supplicia Diis, ludique magni ab Senatu decernuntur, quos Pontifices et Augures et Quindecimviri, Septenviris simul et Sodalibus Augustalibus, ederent. Censuerat L. Apronius, ut Feciales quoque iis ludis praesiderent. Contradixit Caesar, distincto sacerdotiorum iure, et repetitis exemplis: neque enim unquam Fecialibus hoc maiestatis fuisse. ideo Augustales adiectos, quia proprium eius domus sacerdotium esset, pro qua vota persolverentur.

LXV. Exsequi sententias haud institui, nisi insignes, per honestum, aut notabili dedecore: quod

praecipuum munus annualium reor, ne virtutes sileantur, utque pravis dictis factisque ex posteritate et infamia metus sit. Ceterum tempora illa adeo infecta, et adulatione sordida fuere, ut non modo primores civitatis, quibus claritudo sua obsequiis protegenda erat, sed omnes Consulares, magna pars eorum, qui Praetura functi, multique etiam pedarii Senatores certatim exsurgerent, foedaque et nimia censerent. Memoriae proditur, Tiberium, quotiens curia egredieretur, Graecis verbis in hunc modum eloqui solitum, *o homines ad servitutem paratos!* scilicet, etiam illi, qui libertatem publicam nollet, tam proiectae servientium patientiae taedebat.

LXVI. Paullatim dehinc, ab indecoris ad infesta transgrediebantur. C. Silanum, Proconsulem Asiae, repetundarum a sociis postulatum, Mamercus Scaurus e Consularibus, Iunius Otho Praetor, Brutidius Niger Aedilis, simul corripiunt, obiectantque *violatum Augusti numen, spretam Tiberii maiestatem:* Mamercus, antiqua exempla iaciens, *L. Cottam a Scipione Africano, Ser. Galbam a Catone censorio, P. Rutilium a M. Scauro accusatos.* videlicet Scipio et Cato talia ulciscebantur, aut ille Scaurus, quem pravum suum, opprobrium maiorum Mamercus infami opera de honestabat. Iunio Othoni, litterarium ludum exercere, vetus ars fuit: mox Seiani potentia Senator, obscura initia impudentibus ausis propellebat. Brutidium artibus honestis copiosum, et, si rectum iter pergeret, ad clarissima quaque iturum, festinatio ex stimulabat, dum aequalis, dein superiores, postremo suasmet ipse spes anteire parat: quod multos, etiam bonos, pessimi dedit, qui, spretis, quae tarda cum securitate, praematura, vel cum exitio, properant.

LXVII. Auxere numerum accusatorum Gellius Poplicola et M. Paconius: ille Quaestor Silani, hic

Legatus. Nec dubium habebatur, saevitiae caparumque pecuniarum teneri reum: sed multa adgerebantur etiam insontibus periculosa; cum, super tot Senatores adversos, facundissimis totius Asiae, eoque ad accusandum delectis, responderet solus, et orandi nescius, proprio in metu, qui exercitam quoque eloquentiam debilitat: non temperante Tiberio, quin premeret voce, vultu, eo quod ipse creberrime interrogabat: neque refellere, aut eludere dabatur: ac saepe etiam confitendum erat, ne frustra quaesivisset. Servos quoque Silani, ut tormentis interrogarentur, actor publicus mancipio acceperat. et, ne quis necessariorum iuvaret periclitantem, maiestatis crimina subdebantur, vinclum et necessitas silendi. Igitur, petito paucorum dierum interiectu, defensionem sui deseruit, ausis ad Caesarem codicillis, quibus invidiam et preces miscuerat.

LXVIII. Tiberius, quae in Silanum parabat, quo excusati sub exemplo acciperentur, libellos D. Augusti de Voleso Messalla, eiusdem Asiae Proconsule, factumque in eum Senatus consultum recitari iubet. Tum L. Pisonem sententiam rogat. ille, multum de clementia Principis praefatus, aqua atque igni Silano interdicendum, censuit, ipsumque in insulam Gyarum relegandum. Eadem ceteri, nisi quod Cn. Lentulus, separanda Silani materna bona (quippe alia parente geniti) reddendaque filio dixit, adnuente Tiberio.

LXIX. At Cornelius Dolabella, dum adulacionem longius sequitur, increpitis C. Silani moribus, addidit, ne quis vita probrosus et opertus infamia, provinciam sortiretur: idque Princeps diiudicaret. nam a legibus delicta puniri: quanto fore mitius in ipsos, melius in socios, provideri, ne peccaretur? Adversum quae disseruit Caesar: non quidem sibi ignara, quae de Silano vulgabantur: sed non ex rumore statuendum. multis in provinciis, contra quam spes aut metus de illis fue-

rit, egisse. excitari quosdam ad meliora magnitudine rerum; habescere alios. neque posse Principem sua scientia cuncta complecti: neque expedire, ut ambitione aliena trahatur. ideo leges in facta constitui, quia futura in incerto sint. sic a maioribus institutum, ut, si anteissent delicta, poenae sequerentur. ne verterent sapienter reperta, et semper placita. satis onerum Principibus, satis etiam potentiae. minui iuria, quotiens gliscat potestas: nec utendum imperio, ubi legibus agi possit. Quanto rario apud Tiberium popularitas, tanto laetioribus animis accepta. Atque ille prudens moderandi, si propria ira non impellereatur, addidit, insulam Gyarum inmitem et sine cultu hominum esse: darent Iuniae familiae, et viro quondam ordinis eiusdem, ut Cytheram potius concederet. id sororem quoque Silani, Torquatam, priscae sanctimoniae virginem, expetere. In hanc sententiam facta discessio.

LXX. Post audit Cyrenenses, et, accusante Anchario Prisco, Caesius Cordus repetundarum damnatetur. L. Ennium, Equitem Romanum, maiestatis postulatum, quod effigiem Principis promiscuum ad usum argenti vertisset, recipi Caesar inter reos vexit; palam adsperrnante Ateio Capitone, quasi per libertatem. Non enim debere eripi Patribus vim statuendi: neque tantum maleficium impune habendum. sane latus in suo dolore esset; Reip. iniurias ne largiretur. Intellexit haec Tiberius, ut erant magis, quam ut dicebantur: perstititque intercedere. Capito insignitior infamia fuit, quod, humani divinique iuris sciens, egregium publicum et bonas domi artes dehonestavisset.

LXXI. Incessit dein religio, quoniam in templo locandum foret donum, quod pro valetudine Augustae Equites Romani voerant Equestri Fortunae, nam etsi delubra eius Deae multa in urbe, nullum ta-

men tali cognomento erat. repertum est, aedem esse apud Antium, quae sic nuncuparetur, *cunctasque caerimonias Italicas in oppidis, templaque et Numinum effigies, iuris atque imperii Romani esse.* ita donum apud Antium statuitur. Et, quando de religionibus tractabatur, dilatum nuper responsum adversus Servium Maluginensem, Flaminem Dialem, prompsit Caesar, recitavitque decretum Pontificum: *quotiens valetudo aduersa Flaminem Dialem incessisset, ut, Pontificis Maximi arbitrio, plus quam binoculum abesset: dum ne diebus publici sacrificii, neu saepius quam bis eundem in annum.* Quae, Principe Augusto constituta, satis ostendebant, annuam absentiam, et provinciarum administrationem Djalibus non concedi. memorabaturque L. Metelli, Pontificis Maximi, exemplum, qui Aulum Postumium, Flaminem, attinuisse. Ita sors Asiae in eum, qui Consularium Maluginensi proximus erat, conlata.

LXXII. Iisdem diebus Leptidus ab Senatu petivit, *ut basilicam Pauli, Aemilia monimenta, propria pecunia firmaret ornaretque.* erat etiam tum in more publica munificentia: nec Augustus arcuerat Taurum, Philippum, Balbum, hostiles exuvias, aut exundantis opes, ornatum ad urbis et posterum gloriam conferre. quo tum exemplo Lepidus, quamquam pecuniae modicus, avitum decus recoluit. At Pompeii theatrum igne fortuito haustum, Caesar exstructurum pollicitus est, *eo quod nemo e familia restaurando sufficeret; manente tamen nomine Pompeii.* simul laudibus Seianum extulit, *tamquam labore vigilantiaeque eius tanta vis unum intra damnum stetisset.* Et censuere Patres, *effigiem Seiano, quae apud theatrum Pompeii locaretur.* neque multo post Caesar, cum Iunium Blaesum, Proconsulem Africæ, triumphi insignibus attolleret, dare id se, dixit, *honori Seiani,* cuius ille avunculus erat.

LXXXIII. Ac tamen res Blaesi dignae decore tali fuere. nam Taefarinatas, quamquam saepius depulsus, reparatis per intima Africæ auxiliis, huc adrogantiae venerat, ut legatos ad Tiberium mitteret, sedemque ultro sibi atque exercitui suo postularet, aut bellum inexplicabile minitaretur. Non alias magis sua Populique Rom. contumelia indoluisse Caesarem ferunt, quam, quod desertor et praedo, hostium more ageret. ne Spartaco quidem, post tot consularium exercituum clades inultam Italiam urenti, quamquam Sertoriū atque Mithridatis ingentibus bellis labaret Respublica, datum, ut pacto in fidem acciperetur: nedum, pulcherrimo Populi Romani fastigio, latro Tacfarinas pace et concessione agrorum redimeretur. Dat negotium Blaeso, ceteros quidem ad spem proliceret arma sine noxa ponendi; ipsius autem Ducis quoquo modo potiretur.

LXXXIV. Et recepti ea venia plerique. mox adversum artes Tacfarinatis haud dissimili modo belligeratum. Nam quia ille, robore exercitus impar, furiandi melior, plures per globos incursaret eluderetque, et insidias simul tentaret, tres incessus, totidem agmina parantur. ex quis Cornelius Scipio Legatus praefuit, qua praedatio in Leptinos, et suffugia Garamantum: alio latere, ne Cirtensium pagi impune traherentur, propriam manum Blaesus filius duxit: medio, cum delectis, castella et munitiones idoneis locis imponens, Dux ipse arta et infensa hostibus cuneta fecerat; quia, quoquo inclinarent, pars aliqua militis Romani in ore, in latere, et saepe a tergo erat: multique eo modo caesi, aut circumventi. Tunc tripartitum exercitum plures in manus dispergit, praeponitque Centuriones virtutis expertae: nec, ut mos fuerat, acta aestate retrahit copias, aut in hibernaculis veteris provinciae componit: sed ut in limine belli, dispositis castellis, per expeditos et solitudi-

num gnaros, mutantem mapalia Tacfarinatem protrabat: donec, fratre eius captio, regressus est, properantius tamen, quam ex utilitate sociorum; relictis, per quos resurget bellum. Sed Tiberius pro confecto interpretatus, id quoque Blaeso tribuit, ut *Imperator* a legionibus salutaretur; prisco erga Duces honore, qui bene gesta Rep. gaudio et impetu victoris exercitus conclamabantur: erantque plures simul Imperatores, nec super ceterorum aequalitatem concessit quibusdam et Augustus id vocabulum; ac tunc Tiberius Blaeso postremum.

LXXV. Obiere eo anno viri inlustres, Asinius Sallinus, M. Agrippa et Pollione Asinio avis, fratre Druso, insignis, Caesarique progenie destinatus. Et Capito Ateius, de quo memoravi, Principem in civitate locum studiis civilibus adsecutus; sed avo Centurione Sullano, patre Praetorio. Consulatum ei adceleraverat Augustus, ut Labeonem Antistium, iisdem artibus praecellentem, dignatione eius magistratus anteiret. Namque illa aetas duo pacis decora simul tulit. sed Labeo incorrupta libertate, et ob id fama, celebratior: Capitonis obsequium dominantibus magis probabatur. Illi, quod Praeturam intra stetit, commendatio ex iniuria; huic, quod Consulatum adeptus est, odium ex invidia oriebatur.

LXXVI. Et Iunia sexagesimo quarto post Philipensem aciem anno, supremum diem explevit, Catone avunculo genita, C. Cassii uxor, M. Bruti soror. Testamentum eius multo apud vulgum rumore fuit; quia, in magnis opibus, cum ferme cunctos proceres cum honore nominavisset, Caesarem omisit. quod ci viliter acceptum: neque prohibuit, quo minus laudatione pro rostris ceterisque solennibus funus cohonestaretur. Viginti clarissimarum familiarum imagines antelatae sunt, Manlii, Quintii, aliaque eiusdem

nobilitatis nomina: sed prae fulgebant Cassius atque
Brutus, eo ipso, quod effigies eorum non visebantur.

C. CORNELII TACITI

A B

EXCESSV DIVI AVGVSTI

A N N A L I V M

LIBER QVARTVS.

BREVIARIVM LIBRI.

CAP. 1. *Tiberius saevit. Caussa penes Ael. Seianum, cuius ingenium et mores.* 2. *Is ad dominacionem adspirat, quo ut perveniat, Romae in castra Praetoria militem conducit.* 3. *Druso, Tiberii filio, insidiatur per uxorem eius, stupro pollutam.* 4. *Drusus Germanici togam virilem sumit. Status publicus, numerus legionum,* 5. *earum et cohortium et classium loca exponuntur.* 6. *Civilis administratio qualis hactenus.* 7. *Seianus potentiam auget,* 8. *sublato per venenum Druso.* *Tiberius animum obfirmat, Senatum erigit, eique filios Germanici duo commendat, ut imperii heredes.* 9. *Funus Druso inlustre.* 10. 11. *Falsa de Druso ab incauto patre necato fama.* 12. *Populi favor filiis Germanici noxiis. Iis et Agrippinae Seianus insidias struit.*

13. *Tiberius legationes et accusations civitatum et provinciarum audit.* 14. *De asylis actum; Histriones Italia pulsi.* 15. *Alter ex Drusi liberis obit. Item Lucilius Longus, Principis amicus. Capito damna-*